

per conzonersi con le galie grosse, qual erano alquanto più terazade di le nave. Nemici havia tuta l'armada de faio, prese vigoria, se messeno dreto, *adeo* à largato alquanto, parendoli esser a termine. Le nave, tenendo l'armata nimicha im bistante, poteano esser a tempo, hessendo il tempo piazevole di provenza, provochato da la oportunità e di la sviserata dispositiom per salvar Modom, privo di soccorso, e per el clamor di galioti vigorosi, qualli da ogni parte exclamava: Investir! Investir! li parse ad haver vitoria. E fato li segni soi per el bombardar ordinato, e dete principio a bombardar con le galie grosse e sotil. Et hessendo l'arma' nimicha propinqua, e ajutando pur il vento alquanto le galie grosse, fato il segno de investir, il vice capetanio fu el primo, justa l'hordine, a ferir. Qual have coloquio con chi li era; zoè con galie nuove investì da una parte di l'armata, scorendo drieto a lui le altre galie grosse, *adeo* la bataglia fu in hordine; e le galie nostre, da l'altro canto, andava bresaiando, *adeo* i nimici si vedeva streti, aspetando l'impeto di le sue galie dil capetanio. Erano nostri a termine di haver gloriosa vitoria; e già con l'artilaria havia fato gran frachasso. Erano turchi spanti, e comè quelli che dubitavano, con cercha 60 galie sotil e bastarde deteno adosso do nostre galie grosse erano adrieto; quale, scharamuzando virilmente, aspetando 4 galie grosse, erano sorane vicine, e in termine di poter gaiardamente investir e liberar le do, e nuoser assa' a i nimici. E quelli, comè nemici al stato nostro, spreto l'hordine, saltò a l'orza, e se slargono senza investir ni far demonstration alcuna, ni ritornando, come era l'hordine, al bersaiar. E ancora lui provedador fosse con poche galie sotil contra tre per una, et per il grado teniva, *tamen* per dar cuor et exempio, facendo comandamenti e segnali a le galie grosse scorse, che rendeseno la volta, si strense con vigoria avanti per socorer ditte do galie, bombardando; *unde*, per disgracia, da poi molte bombarde et passavolanti tratoli, non senza pericolo di la persona, fo trato una bombarda qual li dete in la poppe, a raso aqua, a banda sinistra, e li trapassò da l'altro chanto, *taliter* che da una banda portò via 6 corbe, da l'altra 4; *unde* per l'aqua veniva in galia, non si poteva tenir, et li ufficiali, cargato bem a prova, per sublevar la poppe, con sachi pieni e schiavine, alquanto remediato, avanzono l'aqua, e fatosi remurchiar d'alcune galie vicine fuor di la furia, se ajutono con bastriere et altri remedij, e, peso, el vento, che pur alquanto segondava, cessò, et le nave erano vicine uno mio, non se interponendo quelle do galie, re-

stono in mezo scaramuzando fino notte scura, per esser sfondrato la galia, e altre, oltra quelle che da si andava a fondi. Sopravene la notte *etc.*; et quelle do nostre galie fè virilmente, e fè tanta carne di nimici, cossa incredibile. Or, esso vice capetanio à 'uto di questo gran dispiacer; et le ditte galie, contra l'hordine suo, se incandenò con el bassà, et, si havia soccorso, fevano ben. Si duol di la fortuna, che, per li pechadi nostri, non lassò aver vitoria. Et, slargato, trovò molte galie resentite, che andavano a fondi per esser triste; et a la scharamuza fono *solum* 24 sotil, et 9 grosse; le altre 4 sgindò. Non sa la nome di patroni, acciò punir li possi; et di le nave non sa che dir, se non *etc.* Si duol, et prega la Signoria provedi a tal demeriti; trova le forze di questo cam turco esser potentissime, le nostre mal bastante; et hessendo lassato de impunir, non si troverà tropo che vogliano più investir. È mal contento; *iterum* prega se li provedi. L'arma' turcha è galie 60 sotil, 7 grosse, le do galeaze con 18 quare, fuste, parandarie, schirazi e brigantini, fin numero 230 in 240 velle, e di hora in hora si pol rinfreschar di gente e monition; hanno bellissima artilaria; e in questa scharamuza, chi è sfondrata, chi è resentita; et lui vol andar a tuor aqua per l'armada, e volea mandar a investir in terra do galie, sier Marco Antonio Contarini e sier Zuan Malipiero, con schiope-tieri, bombardieri, provisionati, et 200 barili di polvere per socorer Modon, hanno pocha polvere, et mandarli casse 16 freze et ducati 500. Questi do si haviano oferto, ma el volea mandar el Malipiero sollo, questa note; et è stà sfondrato in la bataglia. Eri sera vene una barcheta, con letere di Modon, *unde* à terminato con li provedadori mandar di note, con tempo fato, 6 galie per socorerli de homeni; perhò aricorda si provedi de qui, e l'armata nostra è mal in hordine di tutto, e lui si vol mostrar a Modon, poi andar al Zante per aqua, et subito tornar; et essendo sfondrà, per non perder la cassa a queste occorentie, abandonò il suo propio haver, e montò nel copano, e andò a la galia fo di sier Nicolò da cha' da Pexaro, e li messe li groppi di la Signoria. Si duol di le galie perse; non gusta la vitoria; dice, si à peccato in troppo cuor, dimanda perdom. Li parse investir, hessendo la nimicha divisa, et per socorer Modon; conforta a far provision *etc.* *Item*, à fato libar le nave di Cypro di gotoni e salli, e la galia fo dil zeneral è ben in hordine, e galioti, non volendo dar il corpo fuori, à posto sopra per sopracomito sier Hironimo Malipiero, *quondam* sier Dario, et si la usa in l'armata con le altre, e la sua